

2TH -

2 Tesalonikə tián

Bələ nii sagı tə, Polə nə púpúní v pa

Tesalonikə tián

Kərisə lià tə nə

Tesalonikə tián bələ nii sagı tə yuu wa sugu

Lìù tə, v nə púpúní sagı ku tə

Ku yi *tuntunu Polə nə púpúní ku.

Lìà tə nə, Polə nə púpúní

Sagı ku tə yi bələ nii sagı tə, Polə nə púpúní v pa *Kərisə lià tə nə, ba nə wulə Tesalonikə nə.

Sagı tə wa sugu

Polə púpúní v sagı ku tə, sə v ma kàrà Tesalonikə Kərisə lià tə.

U təntən v kəni Yu lèè, ba pùé nə yi nədu də Yu ba ga swə duən tə yırı. U kəni Yu lèè, ba nə jùnì Yu, ba ga zıga diàn Yu tutuŋi tə wa yırı. U dān kàrì ba Zwezi-*Kərisə túrí tə nə mɛ, sə ku ya nətɔ. Polə kàrì Kərisə lià tə, sə ba zıgi diàn Yu cwəŋə tə wa, də cuna nə swə tə pùlì luu wa zənzən, nə à yèé càn nə yí ba. U bırı ba, sə ba jun Yu máŋá mama. Ba wa lià duən də yà ba tutuŋi pìà ku pa ba tuŋa yokukwınan. Ba mù lià təntə swìn də, Yuu-Tiu wá pìí v bà síún síún. Ku mù tə yırı, ka tun tutuŋi kúù ba dèñ ja. U caga yayınyına ba nii nə, sə ba tun ba ma na nii wodiu, ndə v mù Polə də lià tə duən tə, ba nə tun Yu tutuŋi tə, nə tun ku nətɔ.

Polə jònì Kərisə lià tə Tesalonikə nə

¹ À mù Polə də Siləven də Timote nə púpúní sagi ku tə. Nə púpúní ku, nə pun *Kərisə lià púlí tə nə, ku nə wulə Tesalonikə nə. Ku púlí təntə də nə nyina Yu də *Yuu-Tiu Zwezi-Kərisə nə vwə duən nə. ² Nə nyina Yu də Yuu-Tiu Zwezi-Kərisə nə wá fwa pubwanu á yira, ba ga pa aba bican sié.

Yuu-Tiu wá bà, v buri luu bura

(1 Tesalonikə tián 1.3-7, Filipə tián 1.3-6, 27-30, Matia 13.40-43, 25.31-46)

³⁻⁴ Nə nubia-ba, á kəni á waa Zwezi nə wuuu, á ga tə kəni á waa v nə á súrí wuuu. Yá sonu tə, á nə swə duən tə, də yi ku súrí wuuu. Á wulə càn də wuwalu wa, á ga tə jə pínú wuuu, á dànà ká pìí á kə á kwa. Ku nətə dān pun, nə jə á yoo, nə ma bwi nə tián nə, *Kərisə lià púlí tə wa. Ku mù nə pun, nə mɛ, sə nə kə Yu lèè mánjá mama wuuu, á yuu yiri.

⁵ Ku càn təntə buri də, Yu bura tə yi cígá nə v twá, v ma buri ka. Tə mù nə wá pa á ya lià tə, á nə mɛ, sə á zu Yu pàrì tə wa. Mə ku mù yiri nə, á dí càn tə. ⁶ Yu mù wá twá də cígá, v ma kə càn lià tə nə, ba nə kəni càn á nə. ⁷ Yá v dān wá pa sié, á mù lià tə nə, á nə dé càn tə. Nə mù də á mù, nə wá na sié təntə, mánjá tə wa, *Yuu-Tiu Zwezi nə wá pìí, v nan Yu *sàń v bà də *malikɛ, tə nə jə diàn. ⁸ U wá ya mənvoov tətəŋi wa, v ma bà, sə v ma kə càn lià tə nə, ba nə yəri Yu, də ba tə, ba nə ba nə Yuu-Tiu Zwezi suywángú tə də nii zílí. ⁹ Ba càn tə, tə nə wá yí ba, tə mù nə mɛ də ba, tə ga wá cùgù ba míámíán, ku ja vələ mánjá mama wuuu, ku nə ba zwè. Ba bwálí wá ya ɣúní də Yuu-Tiu, ba ga wá ya ɣúní də v dun tə, tə nə buri v diàn tə. ¹⁰ Tə mù yìèn təntə wá tun Zwezi-Kərisə túrí dun təntə nə. U dān wá pa lià tə mama, ba nə yi v mù nə ti, pa wá dun. Ba tə mama, ba nə kəni ba waa v nə, wá balu wá. Á də wá ya ku lià təntə wa, á nə pun cígá kàrà tə nə, nə nə

kàrì nè bìrì abà tẹ̀ yírì.

¹¹ Kù m̀ nè pín, nè j̀ǹǹ Yù, máná mama wuuu, nè pín abà. Nè yàá l̀r̀r̀ Yù, sẹ̀ v pa, á ya lià tẹ̀, á cígá nè mɛ, sẹ̀ v kúrì abà, sẹ̀ á ya v lià. Nè yàá l̀r̀r̀ wá, sẹ̀ v twá dẹ̀ v diàn tẹ̀, v pa á tun kù tẹ̀ nè zìen. Nè l̀r̀r̀ Yù, sẹ̀ v pa á tun yozəŋə tẹ̀, á nè tuŋa, sẹ̀ tẹ̀ va yáá wuuu, á nè kəni á waa v nè wuuu tẹ̀ yírì. ¹² Kù m̀ nè wá pa, nè Yuu-Tiu Zwezi yírì tẹ̀ na dun, kù twá dẹ̀ abà. Yá v dẹ̀ ga wá pa, á dẹ̀ na dun. Kù nətɔ tẹ̀ wá twá dẹ̀ pubwanɔ tẹ̀, nè nyina Yù dẹ̀ nè Yuu-Tiu Zwezi-Kərisə nè wá fwa á yira.

2

Yuu-Tiu túrí tẹ̀ yoo

(1 Zwan 2.18, 4.1-3, Matia 24.23-44)

¹ Nè nubia-ba, nè *Yuu-Tiu Zwezi-*Kərisə wá pìí v bà. Yá nè dàn wá kun duən nè v səpuni nè. Kù m̀ nè pín, nè l̀r̀r̀ abà, ² á dànà ká sè, á pa ba gugurə á pubɔŋa tẹ̀. Á dànà ká pa fən ja abà dẹ̀, á nè nì dẹ̀, Yuu-Tiu túrí dun tẹ̀ yí. Liù nè swìn á con dẹ̀, Yù-*Singu tẹ̀ nè bìrì wá kù yoo təntə, á dànà ká sè kù. Nè à yèé, v nè swìn á con dẹ̀, kù yì nè m̀ nii sugu nè, á dànà ká sè kù. Nè à yèé tətə ba nè pín abà sagi, ba ga bìrì dẹ̀, kù sagi təntə nan nè m̀ con, á dànà ká sè kù. ³ Á dànà ká sè, sẹ̀ liù mama twá yoo nədu tətə nè, v ma gɪgarì abà v dugu. Máná tẹ̀, kù dun təntə nè biàn, sẹ̀ kù yí, kù mɛ, sẹ̀ lià zənzən ba nè ken nii nədu, ba v Yù *nii ya luv wa. Yá cuna liù wá bìrì v tiàn luv wa. Mə v m̀ cuna liù təntə nè, Yù lɪ v tún vən nè, sẹ̀ v cùgè. ⁴ Kù bæ təntə nè wá zɪgɪ won tẹ̀ mama nè, ləzoni nè boŋə “Yù”, nè à yèé ba nè pín dun kù. U wá bún dẹ̀, v dwə tẹ̀ mama. Yá v wá zu Yù *diè tẹ̀ tətə wa, v j̀ən lá. U ja v tiàn, v ma jì Yù.

⁵ Á lie á tiàn dẹ̀, à dí yáá à swìn kù yoo təntə á con, máná tẹ̀ wa, à nè yin dẹ̀ abà. ⁶ Síún nè, á yèé kù tẹ̀ nè cìgà yìen təntə yáá nè, sẹ̀ tẹ̀ tun. Tẹ̀ wá

tun, də tə mánjá nə yí. ⁷ Cuna liù tə mù dí yáá, v wulə v tuŋa diàn tutunan, tə nə sègè. Ku dān ga, sə won tə, ku nə cìgà v yáá nə, kèñ ku yá bwálí nə. ⁸ Ku mánjá tǝntə wa, cuna liù tə dān wá buri v tiàn. Yá Yuu-Tiu Zwezi dān wá gu wá də v nii voo. U wá cùgù wá də diàn tə, v nə wá ja bà. ⁹ *Sitana diàn tə nə wá pa cuna liù tə bà. Liù tǝntə wá fwa kunkun yomulan yiri mama, də kunkun muminan, də kunkun yogwaran. ¹⁰ U wá twá kunkun yìèn nə, v ma tun lwaní yiri mama. U wá ja tə, v ma gɨgarɨ là tə, ba nə jén míámíán Yu yáá con, ba vɨga, sə ba sóní cígá tə, ka nə wá jon ba, ba cuna tə wa yiri. ¹¹ Ku mù nə pin, Yu ma tun diàn ba con, tə nə wá pa, ba jén, sə ba pa cígá kunkun tə nə. ¹² Ku yi nətu, sə ku pa Yu bùrì là tə mama bura, ba nə wá cígá tə sè, ba nə sóní, sə ba tun kunkun yìèn tə, sə v cùgù ba.

Yu kúrí aba, sə v jon aba á cuna wa

(1 Piyeṛə 1.3-9, 5.10-11)

¹³ Nə nubia-ba, *Yuu-Tiu sóní á mù zənzən. Nə mù con nə, nə nə mɛ, sə nə kə Yu lèè, mánjá mama á yiri. Yu nə kúrí aba, luɔ jɨɔ mama wa, sə v jon aba á cuna wa. U twá v *Siŋu tə nə, də á nə sè cígá tə nə, v pa á jì v nyièn. ¹⁴ Mə ku mù yiri nə, Yu twá də suywánjù tə, nə nə swìn á con, v ma kúrí aba. U pià, sə á də na tori nə Yuu-Tiu Zwezi-*Kərisə dun tə wa.

¹⁵ Nə nubia-ba, ku mù tə yiri, á zɨga diàn, sə á ja kàrì tə, nə nə kàrì aba, á pa á tiàn nə. Ku nə yi kàrà tə, nə nə swìn á con də nii, nə à yèé kàrà tə, nə nə púpúní nə pa aba, sə á ja tə mɛ. ¹⁶ Nə Yuu-Tiu Zwezi-Kərisə tǝtə də nə nyina Yu sóní nəba. U fwa pubwanu nə yura, v pa nə bicanɨ zùrì mánjá mama, ku nə ba zwè. Yá nə ga jə yala, tə nə zièn. ¹⁷ Ba mù nə wá zùrì á bicanɨ. Ba mù nə wá pa, á zɨgɨ diàn á ga fwa won tə mama, ku nə zièn, á tǝtǝnán də á sǝràn wa.

Á lwərə Yu, á pa nəba

(Romə tìán 15.30-32)

¹ Nə nubia-ba, ku tə, nə nə wá swìn nə ma gúrí, á dàn lòrì Yu á pa nəba. Á lòrì Yu, sə *Yuu-Tiu sugu tə wàní ku sú tia tə mama, sə ku na dun, ndə ku nə jə dun á con nətú. ² Á tə lòrì Yu, á pa nəba, sə v jon nəba ləzwənkukwɪnan, də ləzwənwulunyina ba jìàn wa. Ku cígá mama wa, ku tà lià tə mama, nə ken ba waa Zwezi nə. ³ Yuu-Tiu mù yɪ pùé nədu tíú. U mù nə wá pa á zɪgɪ diàn, v ga cì á nə də *Sítana. ⁴ Á fwa ku tə, nə nə pɪn aba nii, sə á fwa, á ga tə wá fwa ku. Yuu-Tiu pɪn nə jə á diàn ku yoo tə wa. ⁵ Nə Yuu-Tiu nə wá pa á sóní Yu á bɪcɪnɪ wa, sə á píní á dàn Zwezi-*Kərisə.

Ka tun tutuɲɪ nə zìən yoo

(1 Tesalonikə tìán 2.9-10, 4.11-12)

⁶ Nə nubia-ba, nə pɪn aba nii ku tə də nə *Yuu-Tiu Zwezi-*Kərisə yɪrɪ tə. Á pwíá á tiàn á ya yɪɲɪnɪ də liù tə mama, v nə yɪ nə nubiu Kərisə yɪrɪ, v nə ya yayɪnyɪən, v nə ba kàrà tə, nə nə bɪrɪ aba, nii zìlí. ⁷ Á tətə yèé nətú tə, á nə mɛ, sə á fwa, sə á ma ya ndə nə nə. Á yèé də, nə nə yɪn də aba, nə wà yayɪnyina yɪn. ⁸ Nə wà liù wodiu dí tutu. Nə tun nə gwàrì, nə tun tutɪn də yɪcɪv mɛ, sə nə dàn ká ya á liù mama yuu zɪlɪ. ⁹ Nə nə fwa ku nətú tə, ku ba pià ku bɪrɪ də, nə yà ba cwəɲə jə, sə á san nəba. Ku ya nə pià nə bɪrɪ aba nətú tə, á nə mɛ, sə á fwa, sə á twá ku nə. ¹⁰ Ku mù nə pɪn, mánjá tə wa, nə nə yɪn á con, nə swìn á con, nə wú: «Də liù nə ba pià, sə v tun, sə ku tíú dàn ká dé wodiu də!»

¹¹ Nə nènɪ də, á wa lià duən ya yayɪnyina. Ba ba won tuɲa, də ku nə tà, sə ba kə ba tiàn lià duən yìèn wa. ¹² Nə kwè ba lià təntə, nə ga pɪn ba nii ku tə də Yuu-Tiu Zwezi-Kərisə yɪrɪ tə. Nə swìn ba con, sə ba tun ba tùtùnán mánjá mama sənɓwen, sə ba ma na ba nii wodiu.

¹³ Nə nubia-ba, á mù dànà ká gwàrì, də ka fwa zəni. ¹⁴ Də liù nə ba ku tə,

nə nə swìn sagı ku tə wa, nii zìlí, sə á ja ku tíú yoo á pubuŋa wa. Á pwíá á tiàn də wá, sə ku pa cavıra ja wá. ¹⁵ Á dānà ká fwa wá ndə á duŋu nə. Ku me, sə á kwè ku tíú, ndə á nubiu nə.

Sagı tə yígúré sùrán

¹⁶ *Yuu-Tiu tə, u nə pın bıcan sîé tə, nə wá pa aba bıcan sîé. Yuu-Tiu Zwezi nə wá ya də á mama, máná mama wa, yoo yiri mama wa. ¹⁷ Ku tə ya à tətə Polə nə púpúní də à jun, à wú: «Polə jùnì aba.» Á nəŋə nətu tə, à nə yàá tún à jìàn à saga tə mama wa, də nətu, à nə púpúní: ¹⁸ Nə Yuu-Tiu Zwezi-*Kərisə wá fwa pubwanu á yıra.